



AJUDA DI SEU

Ranjadu pa
Watson Goodman

E libru i di grasa;
i ka pudi bindidu

AJUDA DI SEU

“Ajuda Di Seu” i un juntamentu di versikulus tiradu di manga di lugaris na Biblia, ranjadu konformi se asuntos. N fia kuma Biblia propi, el ki komentariu minjor aserka di Skritura.

Palabra di Deus bin “di seu.” I ta tisi garandi ajuda pa korsons ku ta faima pa kusa diritu. Si algin ripindi, i disa pekadu, i kumbida Siñor Jesus Kristu pa mora na si korson suma Salbadur, Siñor i na bin pa ki algin, i na dal kontentamenti ku pas na si korson. Ami propi N proba es na anu 1937; disna di ki tempu N ka kebra e amisadi bonitu ku N ten ku Siñor. N pidiau pa bu ntregal bu vida, bu risibil suma Salbadur ku Siñor GOSI, si bu ka fasil inda.

—Watson Goodman (1920-2002)

AMOR DI DEUS

1

Deus danu proba di si amor pa nos, manera ku Kristu muri pa nos ocanu inda na no pekadu.

—Romanus 5.8

Antis di festa di Paskua, Jesus sibiba ja kuma ora ciga pa i disa e mundu pa i bai pa si Pape. Suma ki ama kilis ki di sil ku staba na mundu, i ama elis te na fin.

—Jon 13.1

Ningin ka ten amor mas garan-di di ki es, di da si vida pa si amigus.

—Jon 15.13

... Jesus Kristu ku sedu fiel tustumuña, purmeru ku lanta di mortu, ku sta riba di reis di tera. I el ku amanu, i libertanu di no pekadu ku si sangi. —Apokalipsi 1.5

Deus ama jinti di mundu dimas, tok i da si uniku Fiju, pa tudu kil ku setal ka ta pirdi, ma i ta ten vida ku ka ta kaba. —Jon 3.16

Tempu ku pasa, SIÑOR bin pa mi, i falan: N amau ku amor ku ka ta kaba. N na jundau pa mi ku bondadi ku amor. —Jeremias 31.3

Kil ku ka tene amor i ka kungsi Deus, pabia Deus i amor. Deus mostra si amor pa nos suma ki manda si un Fiju son pa mundu pa no pudi tene vida pabia del. Es i amor; i ka kuma no ama Deus, ma i el ku amanu; i manda si Fiju pa no pekadu pudi tiradu pabia del.

—I Jon 4.8-10

I ka ten duvida kuma sigridu di no fe i fundu: Kil (Deus) ku parsi na kurpu di omi, na si spiritu i mostradu justu; anjus ojal; tudu rasa kontadu aserka del; jintis di tudu mundu fia nel; i risibidu na gloria na seu. —I Timotiu 3.16

Antis di mundu kumpudu, kil ki palabra i tenba ja; i staba ku Deus; i seduba mesmu Deus. . . . Kil ki palabra i bida omi; i mora na no metadi, incidu di grasa ku bardadi. —Jon 1.1, 14a

E kusa tudu i sedu pa pudi fasi kil ku Siñor falaba ja pa profeta, ku fala asin: Un bajuda na bin preña, i na padi un fiju macu ku na

comadu Emanuel, ku sedu: Deus sta ku nos. —Mateus 1.22, 23

Ami ku ña Pape anos i un son. —Jon 10.30

Suma ku bo kunsin, bo na kungsi ña Pape tambi; desdi gosi bo kunsil; bo ojal ja. Filipi falal: Siñor, si bu mostranu bu Pape, i ta justa. Jesus falal: Filipi, N sta manga di tempu ku bos; bo ka kunsin inda? Kin ku ojan, i oja ña Pape. Kuma ku bu na falan pa N mostra bos Pape? Bu ka fia kuma ami N sta na ña Pape, ña Pape sta na mi? Palabras ku N fala bos, N ka ta falal di mi propi, ma ña Pape ku sta na mi, el ku ta fasi es kusas ku ami N na fasi. —Jon 14.7-10

JESUS, FIJU DI DEUS

3

Kil ku konta klaru kuma Jesus i Fiju di Deus, Deus sta nel; el i sta na Deus. —I Jon 4.15

Anju ruspundi, i falal: Spiritu Santu i na ria riba di bo; puder di ki Deus ku sta riba di tudu i na kubriu ku si sombra. E ku manda ki mininu santu ku bu na padi i na comadu Fiju di Deus. —Lukas 1.35

Pabia un mininu nasi ja pa nos; no dadu un fiju. Tudu puder sta riba di si ombrus; si nomi i na sedu Maravilyosu, Konsilyeru, Deus forti, Pape di Iternidadi, Rei di pas. —Isaiás 9.6

Oca i na papia inda, i bin kubrielis un nuven ku na lampra. Vos

sai na ki nuven ku fala: Es i ña Fiju ku N kiri ciu. N ten garandi kontentamenti nel. Bo sukutal.

—Mateus 17.5

Jesus ruspundil: Bu ojal (Fiju di Deus) já. I el ku na papia ku bo.

—Jon 9.37

Tudu ku Deus sedu sta na Kristu, na si kurpu umanu.

—Kolosensis 2.9

Kuma ku bo fala gora kuma ami ku ña Pape santifika, i manda pa mundu, N lebisil pabia N fala kuma ami i Fiju di Deus? Si N ka ta fasi tarbaju ku ña Pape mandan pa N fasi, ka bo fia na mi.

—Jon 10.36, 37

I fala elis: Abos i di bas; ami i di riba. Abos i de mundu; ami N ka sedu de mundu. . . . Jesus fala elis: N na konta bos bardadi, antis di Abraon padidu, ami N sedu.

—Jon 8.23, 58

Minjer falal: Ami N sibi kuma Mesias (ku ta comadu Kristu) i na bin; ora ki bin i na kontanu tudu. Jesus ruspundil: Ami ki Kristu, ami ku na papia ku bo.

—Jon 4.25, 26

Jesus fala elis: Ami i pon ku ta da vida; kin ku bin pa mi, nunca mas i ka na ten fomi; kin ku setan, nunca mas sedi ka na tenel.

—Jon 6.35

Nkuantu N sta na mundu ami i lus di mundu.

—Jon 9.5

Jesus torna fala elis: Na bardadi, N na konta bos kuma ami ki porta di kural di karnel.

—Jon 10.7

Jesus falal: Ami i resureison, ami i vida. Kin ku setan, inda ki muri, i ta sta bibu.

—Jon 11.25

Bo ta coman Mestre ku Siñor. Bo fala bardadi, pabia ami i el.

—Jon 13.13

Jesus falal: Ami i kamiñu, ami i bardadi, ami i vida. Si algin misti bin pa ña Pape, i ten ku pasa purmeru na mi.

—Jon 14:6

I manda jintis sinta na paja, i toma ki sinku pon ku dus pis, i yalsa uju pa seu, i ora riba delis, i kebra pon, i da si disipulus; kilis da jintis. Tudu kume, e farta. E kuji ki restus ku sobra, e inci dozi kufu. Numeru di omis ku kume i pertu di sinku mil, fora di minjeris ku mininus. —Mateus 14.19-21

Simon ruspundil: Mestre, no tarbaja ciu noti intidu, no ka paña nada. Ma suma ku bu fala asin, N ta bota ridia. E bota, e paña manga di pis, tok ridia misti rumpi. —Lukas 5.5-6

I sintaba dus segus lungu di kamiñu. E obi kuma i Jesus ku na

pasa, e grita e fala: Señor, Fiju di Davi, ten pena di nos! . . . Jesus punta: Ke ku bo misti pa N fasi bos? E falal: Señor, pa bu yabrinu no uju. Jesus sinti garandi pena delis, i toka elis na uju. Ki ora uju yabri ku elis. E pega tras di Jesus. —Mateus 20.30, 32b-34

I bin lanta un garandi turbada na mar; kuás maron na kubriba barku. Ma Jesus ditaba, i na durmi. Si disipulus bai kordal, e falal: Salbanu, Señor, pabia no na muri! Jesus punta elis: Pabia di ke ku bo sta ku medu, omis di puku fe? Dipus, i lanta, i raprindi bentu ku maron; logu tudu keta yem.

—Mateus 8.24-26

6 JESUS KRISTU I KRIADUR I SIÑOR

Pabia del (Jesus) ku tudu kusas kumpudu na seu ku na tera, kil ku ta ojadu ku kil ku ka ta ojadu, tro-nus, ku gubernus, ku otridadis, ku puderis. Deus kumpu tudu kusa pa meu del, i pa el.

—Kolosensis 1.16

Deus fasi tudu kusa pa meu del; i ka ten nada ku fasidu sin el.

—Jon 1.3

Ne dias di kabantada Deus pa-pia ku nos suma ki mandanu si Fi-ju, kil ki pui pa i yarda tudu kusa, ki kumpu mundu tambi pa si mon.

—Ebreus 1.1b-2

E ku manda i bon pa tudu pobu di Israel sibi sertu kuma es Jesus

ku bo prega na krus, Deus fasil Siñor, i fasil Kristu tambi.

—Aktus 2.36

Pabia des ku Kristu muri, i tor-na bibu, pa i sedu Siñor tantu di mortus suma di bibus.

—Romanus 14.9

Deus i fiel, ku coma bos pa bo ten kumuñon ku si Fiju Jesus Kristu no Siñor. —I Korintius 1.9

Tudu jinti na seu, ku na tera, ku bas di tera, ten ku dobra juju pa da nomi di Jesus rispitu. Kada bo-ka ten ku konta klaru kuma Jesus Kristu i Siñor pa gloria di Deus Pai.

—Filipensis 2.10, 11

Ma abo, pa ke ku bu na julga bu ermon? O abo tambi, pa ke ku bu na njuti bu ermon? Pabia tudu nos no ten ku parsi dianti di tribunál di Kristu. —Romanus 14.10

Dianti di Deus, ku Kristu Jesus ku ten di julga bibus ku mortus, pabia i ten ku bin pa rena. . . .
—II Timotiu 4.1

Ora ku Fiju di omi bin na si gloria, ku tudu anjus, i na sinta na tronu di si gloria. Tudu nason e na juntadu si dianti; i na rapati elis na dus grupu suma ku bakiadur ta rapati karnel ku kabra.
—Mateus 25.31, 32

Ña Pape ka ta julga ningin, ma i da si Fiju tudu puder pa julga.
—Jon 5.22

Asin ki na sedu na dia ku Deus ku Jesus Kristu ten ku julga sigridu di jinti, suma Bon Noba ku N prega fala.
—Romanus 2.16

(Jesus) i mandanu pa konta po-bu aserka del, kuma i el ku Deus pui pa i sedu juís di bibus ku mortus.
—Aktus 10.42

I tene kabás na si mon pa buanta paja na arus na kau di masa. I na rukuji arus na si bembá, ma i na kema paja na fugu ku nunka ka ta paga.
—Lukas 3.17

8 SON KRISTU KU TA LIBRANU DI PEKADU

Ami i porta; kin ku yentra na mi i ta salba, i ta parsi suma karnel ku na yentra, i na sai, i na oca paja pa kume. —Jon 10.9

Jesus falal: Ami i kamiñu, ami i bardadi, ami i vida. Si algin misti bin pa ña Pape, i ten ku pasa purmeru na mi. —Jon 14.6

E ku manda N fala bos kuma bo na muri na bo pekadu, pabia si bo ka fia kuma N sedu kil ku N sedu, bo ta muri na bo pekadu. —Jon 8.24

Oca i fasidu pirfitu, i bin sedu fonti di salbason ku ka ta kaba pa tudu kilis ku obdisil. —Ebreus 5.9

E ku manda tambi i pudi salba kompletu kilis ku bin pa Deus pa-

bia del, suma ki na bibu pa sempri pa i roga Deus pa elis. —Ebreus 7.25

I ka ten nin utru algin ku pudi salba, pabia ne mundu li i ka ten nin utru nomi ku dadu jinti ku no pudi sedu salbu pa el. —Aktus 4.12

Suma ku Kristu bida maldison pa nos, i kaplintinu di maldison ku lei tisi, pabia i sta skritu kuma tudu kil ku pinduradu na madera i maldisuadu. —Gálatas 3.13

Oca tempu propi ciga, Deus manda si Fiju, ku padidu di minjer, i kria bas di lei, pa i pudi resgata kilis ku staba bas di lei, pa no pudi bin sedu fiju di Deus.

—Gálatas 4.4, 5

Ma Deus junta bos ku Jesus Kristu; i fasil jiresa pa nos. Pabia del tambi i fasinu justu, i santifikanu, i libertanu. —I Korintius 1.30

El i da si vida pa libertanu di tudu maldadi, pa fasinu un pobu puru ku pertensil, ku ten vontadi pa fasi bon tarbaju. —Titu 2.14

Bo fala obrigadu pa Pai ku fasi bos mersiduris di toma parti di kil ki guarda pa si pobu na renu di lus. El i sakoranu di puder di sukuru; i kambantanu pa renu di si Fiju amadu na kin ku no libertadu, no pekadu purdadu.

—Kolosensis 1.12-14

Fiju di omi bin buska kil ku pir-di, pa salbal. —Lukas 19.10

E na kantaba un kantiga nobu ku fala: Abo i mersidur di toma libru, pa kebra si selus, pabia bu matadu; ku bu sangi bu kumpra omis pa Deus di tudu rasa, di tudu lingu, di tudu pobu, di tudu nason.

—Apokalipsi 5.9

Pabia tudu jinti peka; e ka yangasa naturesa gloriosu di Deus. E ta ocadu justu sin paga nada, pabia di fabur di Deus, manera ku Kristu Jesus kaplinti elis.

—Romanus 3.23, 24

Pabia Deus ka kujinu pa si rai-ba sta riba di nos, ma pa no yangasa salbason pa meu di no Siñor Jesus Kristu.

—1 Tesalonisensis 5:9

Suma no ocadu justu pa si sangi, kuma gora ki ka na salbanu di raiba di Deus? —Romanus 5.9

Pabia di si sangi no libertadu, no pekadu purdadu. Ala ku no ta oja rikesa di fabur di Deus.

—Efésius 1.7

Es i ña sangi, sangi di kontratu, ku darmadu pa manga di jinti, pa purdon di pekadus. —Mateus 26.28

Bo sibi kuma i ka kusa ku ta dana, suma prata o ôru, ku pagadu pa liberta bos di bo manera di yanda ku ka bali, ku bo yarda di bo papes di antigu, ma i sangi di Kristu ku ten balur, el ki suma un karnel ku ka ten nin manca nin difeitu. —I Pedru 1.18, 19

Si no yanda na lus, suma ku el sta na lus, no ta liga un ku utru; sangi di Jesus, si Fiju, i ta limpanu di tudu pekadu. —I Jon 1.7

Ku fadi gora puder di sangi di Kristu pa limpa no konsiensia di kustumus ku ta tisi mortu, pa no sirbi Deus bibu! Ku ajuda di Spiritu ku ta bibu pa sempri, Kristu da si vida pa Deus, suma sakrifisiu ku ka ten manca. —Ebreus 9.14

Manera ku no seduba si inimi-gu, Deus fasinu si amigu pabia di mortu di si Fiju. Gosi ku no sedu amigu di Deus, kuma ku no ka na sedu salbu pabia di si vida?

—Romanus 5.10

I pabia di si fabur ku bo sedu salbu, na bo fe. Es i ka bin di bos; i kusa ku Deus pati. I ka rusultadu di bo propi sforsu, pa ka ningin ten manera di njata. —Efésius 2.8, 9

Manera ku no ocadu justu pa fe, no ten pas ku Deus pabia di no Siñor Jesus Kristu. —Romanus 5.1

Si no sta unidu ku Kristu Jesus, nin sirkunsison nin falta del ka ta fasi diferenza. Kusa mas mportanti i fe ku ta tarbaja ku amor.
—Gálatas 5.6

Tudu fiju di Deus ta vensi mundu. Vitoria ku vensi mundu i no fe.
—I Jon 5.4

E punta Jesus: Kal tarbaju ku

Deus misti pa no fasi? Jesus ruspundi elis: Kusa ku Deus misti i pa bo fia na kil ki manda.

—Jon 6.28, 29

E kusas sta skritu pa bo fia kuma Jesus i Mesias, Fiju di Deus, pa ora ku bo fia nel, bo ta ten vida na si nomi. —Jon 20.31

... pa N pudi ojadu unidu ku el. Gosi N ka na oca kuma ami N justu pabia di kumpri lei, ma N justu pabia di fe na Kristu. Deus fa sin justu pabia di ña fe.

—Filipensis 3.9

E ruspundil: Seta Siñor Jesus, bu ta salba, abo ku tudu bu familia.
—Aktus 16.31

Manera ku seu sta la lunju riba di tera, asin ku si miserikordia i garandi pa kilis ku rispital. . . . Miserikordia di SIÑOR i di iternidadi pa iternidadi riba di kilis ku rispital; si bondadi sta riba di se fijus ku netus. —Salmu 103.11, 17

N ngaba Deus, . . . Pape ku ta ten pena di nos, Deus ku tudu ko-ražen bin del. —II Koríntius 1.3

I pabia di miserikordia di SIÑOR ku no sta di vida te gosi; si garandi amor ka ta kaba. I nobu kada mañá. Abo i fiel dimás. —Lamentason 3.22, 23

Kin ki Deus suma abo, ku ta purda pekadu, ku ta diskisi di kul-

pa di kilis di bu pobu ku sobra? Bu ka ta fika ku raiba pa sempri, ma bu gusta di mostra miserikordia. —Mikeias 7.18

Bu miserikordia i garandi, i sta riba di seus; bu bondadi i ta pasa na nuvens mas altu. —Salmu 108.4

I salbanu, i ka pabia di algun kusa bon ku no fasi, ma pa si miserikordia ki labanu, i danu nobu nasimentu, un vida nobu di Spiritu Santu. —Titu 3.5

Asin no ciga ku fiansa dianti di tronu di Deus, nunde ku no na oja fabur, pa no yangasa miserikordia ku fabur, ku ajuda na ora ku no pirsisa del. —Ebreus 4.16

SIÑOR fala: Bo bin pa no ruma no kombersa. Nin ku bo pekadus sedu suma karvon, elis e na bida branku fandan; nin ke sedu burmeju suma sangi, e na torna suma algudon.
—Isaiás 1.18

Spiritu ku noiva e fala: Bin. Kin ku obi pa i fala: Bin. Kin ku ten sedi pa i bin. Kin ku misti, i ta toma, sin paga nada, yagu ku ta da vida.
—Apokalipsi 22.17

Na ultimu dia, mas garandi di festa, Jesus firma, i papia risu, i fala: Kin ku ten sedi, pa i bin bibi na mi.
—Jon 7.37

Abos tudu ku teni sedi, bo bin pa yagu; abos ku ka teni diñeru,

bo bin, bo kumpra, bo kume. Sin, bo bin, bo kumpra biñu ku liti, sin diñeru, di grasa.
—Isaiás 55.1

Oca ku Jesus rapara ke ku na pasa, i fika kasabi, i fala elis: Bo disa mininus bin pa mi. Ka bo tuji elis, pabia Deus ta rena riba di jinti suma elis.
—Markus 10.14

Bo bin pa mi, abos tudu ku kansa ku kargu pesadu; N na diskan-sa bos.
—Mateus 11.28

I salbanu, i comano pa no sedu si pobu. I ka pabia di kil ku no fasi, ma pabia di si planu, ku si fabur. I danu es fabur pabia di Kristu Jesus, antis di kumsada di tempu.
—II Timotiu 1.9

14 I KA TUDU JINTIS KU SEDU FIJUS DI DEUS

Es ku ta mostra fijus di Deus ku fijus di diabu: kil ku ka ta fasi kusus diritu, ku ka ama si ermon, i ka di Deus. —I Jon 3.10

Pa bo pudi sedu puru, inusenti, fijus di Deus sin kulpa, ku na vivi na mundu di jinti mau i tortu. Bo ten ku lampra na se metadi suma strela ku na numia mundu.

—Filipensis 2.15

E ku manda Siñor fala: Bo sai na se metadi; bo separa delis. Ka bo toka nada susu; ami N ta risibi bos, N ta sedu bo Pape; bo ta sedu ña fijus macu ku femia.

—II Koríntius 6.17-18a

Tudu kilis ku Spiritu di Deus na gia, esis i fiju di Deus. Pabia Spiri-

tu ku bo risibi i ka ta fasi bos katibu pa bo pudi torna ten medu, ma bo risibi Spiritu ku fasi bos fijus, ku ta pui pa no coma: Deus no Pape. —Romanus 8.14, 15

Tudu jinti ku setal, kilis ku fia na si nomi, i da elis diritu di sedu fiju di Deus. —Jon 1.12

Na ki tempu bo na sigiba mau kamiñu di mundu; bo ta obdisiba šef ku ta manda riba di puderis spiritual di ar, spiritu ku na manda te gosi na jinti ku ta disobdisi Deus. —Efésius 2.2

I ka tudu jintis ku na falan: Siñor, Siñor, ku na yentra na renu di seu, ma i kil ku fasi vontadi di ña Pape ku sta na seu. —Mateus 7.21

No yanda onestu, suma kin ku na yanda di dia. Ka no yanda na wukesa, nin na camidera, nin na vida susu, nin na puku borgoña, nin na jusia, nin na nveža, ma bo kubri ku armadura di Siñor Jesus Kristu. Ka bo alimenta mau disežu di bo naturesa.

—Romanus 13.13-14

Koitadi di kilis ku ta lanta di par mañá pa buska se bibida; di noti e ta tarda te altas oras tok e camí ku biñu.

—Isaías 5.11

I klaru kuma ku naturesa di omi ta fasi; i ta mostradu na pekadu seksual, na vida susu, na puku borgoña, na adora ídulus, na futis, na inimisadi, na jus, na kumbosa-

dia, na raiba, na junda-junda, na rapatimentu di partidus, na nveža, na bibidera, na wukesa, ku utru kusas ku parsi suma es. N na avisa bos, suma ku N tarda avisa-ba ja, kuma kilis ku ta fasi asin ka na ten parti na renu di Deus.

—Gálatas 5.19-21

Ka bu jubi pa ki biñu burmeju ku ta lampira na kopu, ku ta kai sabi. Mas tardi i ta murdi suma kobra, i ta ferca suma lakaran.

—Provérbios 23.31, 32

Pabia i na sedu algin garandi dianti di Siñor. I ka na bibi biñu nin bibida forti. Spiritu Santu na sta nel desdi bariga di si mame.

—Lukas 1.15

Jesus falal: Ama Siñor bu Deus ku tudu bu korson, ku tudu bu alma, ku tudu bu ntindimentu. Es ki garandi mandamentu, el ki purmeru di tudu. —Mateus 22.37-38

Bon Mestre, ke ku N dibi di fasi pa ngaña vida ku ka ta kaba? Jesus puntal: Pa ke ku bu na coman bon? Ningin i ka bon; Deus son ki bon. Bu kungsi mandamentus: Ka bu mata; ka bu kai cai, ka bu furta; ka bu lanta falsu tustumuñu; ka bu nturja; rispita bu pape ku bu mame. Omi ruspundi, i falal: Mestre, N guarda e kusas tudu desdi pikininu. Jesus finku uju nel ku amor, i falal: Un kusa son ku faltau. Bai, bu bindi tudu ku bu

ten, bu da ki diñeru pa pobris, bu ta ten rikesa na seu. Dipus, bu ta bin, bu signin. Oca ku omi obi e palabra, si rostu rabida, i bai tristi, pabia i teneba manga di rikesa.

—Markus 10.17-22

I ten kamiñu ku omi ta oja kuma i sedu diritu, ma na fin i ta lebal pa mortu. —Provérbius 16.25

Kin ku fia na Fiju di Deus i tene e tustumuñu dentru del. Kin ku ka fia na Deus, i na comal munturus, pabia i ka fia na tustumuñu ki da di si Fiju. Es i ki tustumuñu, kuma Deus danu vida ku ka ta kaba; e vida sta na si Fiju. . . . Kin ku ka tene Fiju di Deus i ka tene vida. —I Jon 5.10-12b

Ka bo ngana bo kabesa; ningin ka pudi fasi Deus diskarna. Kil ku omi sumia, el ki na kebra tambi.

—Gálatas 6.7

Ña fijus, ka bo disa ningin ngana bos. Kil ku ta fasi kusas diritu, ki algin i justu, suma ku Kristu i justu. Kin ku ta fasi pekadu i di diabú, pabia diabú peka desdi kumsada.

—I Jon 3.7-8a

Bo ka sibi kuma kilis ku ta fasi mal ka na ten parti na renu di Deus? Ka bo ngana bo kabesa, pabia nin kilis di mau vida, nin kilis ku ta adora idulus, nin kilis ku ta kai cai, nin kilis ki omoseksual, nin ladrons, nin kilis ku ten mon risu, nin camiduris, nin koba-

duris di mal, nin ntorjons, ka na ten parti na renu di Deus.

—I Koríntius 6.9-10

Ka bo disa ningin ngana bos ku palabra lebi; i pabia de kusas propi ku raiba di Deus na bin riba di kilis ku ka ta obdisi.

—Efésius 5.6

Ka bo sedu son obiduris di palabra; si i asin, bo na ngana bo kabesa. Ma bo sedu fasiduris di kil ku palabra fala.

—Tiagu 1.22

Si algin kuda kuma el i algin, ma el i ka ningin, i na ngana si kabesa.

—Gálatas 6.3

Pabia manga delis e na bin na ña nomi, e na fala kuma elis i Kristu. E na ngana manga di jinti.

—Mateus 24.5

Pekadu yentra na mundu pabia di un omi; i tisi mortu. Asin tamba mortu pasa pa tudu jintis pabia tudu peka. —Romanus 5.12

Ora ku ki disežu mau preña, i ta padi pekadu. Ora ku pekadu kirsu, i ta padi mortu. —Tiagu 1.15

Si pensamentu bai pa kusas di naturesa, i ta tisi mortu, ma si i bai pa kusas di Spiritu, i ta tisi vida ku diskansu. Pensamentu di no naturesa i inimisadi kontra Deus; i ka ta obdisi lei di Deus. Na bardadi i ka pudi. —Romanus 8.6, 7

Kil ku fasi pekadu, el ku na muri. Fiju ka na leba kulpa di si pape, nin pape ka na leba kulpa di

si fiju. Algin justu i na pagadu pa kusas bon ki fasi; impiu i na sufri pa mal ki fasi. —Ezekiel 18.20

I bon pa . . . no kontenti, pabia bu ermon staba mortu, i torna bibu; i pirdiba, i ojadu. —Lukas 15.32

Algin ku ta yanda diritu i ta yangasa vida, ma kil ku bai tras di mal i na fasil pa si mortu.

—Provérbius 11.19

Ma pa kilis ku kobardu, ku kilis ku ka fiel, ku jinti di vida susu, ku mataduris, ku kaiduris di cai, ku botaduris di sorti, ku kilis ku ta adora idulus, ku tudu munturus, se lugar i na sedu na lagua ku na yardi ku fugu ku nsofri; el ki sugundu mortu. —Apokalipsi 21.8

Oca i kaba di papia, i yalsa vos i fala: Lazaru, sai pa fora! Difuntu sai. I teneba si pe ku mon maradu ku banda; si rostu staba kubridu ku lensu. Jesus fala elis: Bo dismaral pa i pudi yanda.

—Jon 11.43-44

I ciga, i toka na kaşon; kilis ku na lebal e para. Jesus fala: Rapás, abo ku N na fala, lanta! Difuntu lanta i sinta, i kumsa na papia.

—Lukas 7.14-15a

Ña Papa aman, pabia N sta pruntu pa da ña vida pa N torna tomal. Ningin ka ta tiran ña vida, ma ami propi ku ta dal. N ten puder pa N dal, ku puder pa N tor-

na tomal. Asin ku ña Pape mandan pa N fasi.

—Jon 10.17-18

Na ladu di spiritu di santidadi, manera ki lanta di mortu i mostradu ku puder kuma el i Fiju di Deus.

—Romanus 1.4

Ami i kil ku bibu; N muriba ma alin li bibu pa tudu sempri. N tene cabi di mortu ku di lugar di mortus.

—Apokalipsi 1.18

Kusa mas mportanti i es: N pa-santa bos kil ku N risibi, kuma Kristu muri pa no pekadu suma ku Skritura fala. I nteradu; na dia di tris i lantandadu di mortu, suma ku Skritura fala.

—1 Koríntius 15.3, 4

Ka bu ten utru deusis fora di mi.

Ka bu kumpu imažen pa bo, ku ten forma di kusa ku sta la riba na seu, nin li na tera, nin na yagu bas di tera. Ka bu mpina pa elis, nin ka bu adora elis

Ka bu toma nomi di SIÑOR bu Deus na nada, pabia SIÑOR ka na coma ki algin inusenti ku toma si nomi na nada.

Guarda dia di diskansu, bu pul aparti pa Deus, suma SIÑOR bu Deus mandau. Ba ta tarbaja seis dia, bu fasi tudu ku bu ten ku fasi

Rispita bu pape ku bu mame, suma ku SIÑOR bu Deus mandau.

Ka bu mata.

Ka bu kai cai.

Ka bu furta.

Ka bu lantanda tustumuñu falsu kontra bu kumpañer.

Ka bu kubisa minjer di bu kumpañer, nin ka bu kubisa si kasa, nin si lugar, nin si kriadu macu o femia, nin si tôru, nin si buru, nin kalker kusa ki di bu kumpañer.

—Deuteronómiu 5.7-21

Mestri, kal ki mandamentu mas garandi di lei? Jesus falal: Ama Siñor bu Deus ku tudu bu korson, ku tudu bu alma, ku tudu bu ntindimentu. Es ki garandi mandamentu, el ki purmeru di tudu.

—Mateus 22.36-38

Si uju sta riba di kamiñus di tudu jinti, i ta oja elis na tudu kau ke bai. I ka ten nin sukuru, nin sombra di mortu, nunde ku jinti ku na fasi mal pudi sukundi.

—Job 34.21-22

SIÑOR i punta: Algin pudi sukundi na un kau nunde ku N ka ta ojal? Nta ami N ka ta inci seus ku tera?

—Jeremias 23.24

Palabra di Deus i bibu, i forti. I ta korta mas di ki spada di dus boka; i ta yentra te dentru di algin nunde ku alma ku spiritu ta rapati; te na metadi di juntamentu di os. I kapás di julga vontadi ku pensamentu di korson. I ka ten nada ku Deus kumpu ku pudi su-

kundi del, ma tudu kusa sta nun, i klaru na uju di kil ku no ten di da konta si dianti. —Ebreus 4.12, 13

Si N síbi pa seu, bu sta la; si N dita na kau di mortus, bu sta la tambi. . . . Te sukuru i ka ta sukundin di bo, pabia di noti ta numia suma di dia. Sukuru ku lus i tudu mesmu kusa pa bo.

—Salmu 139.8, 12

Uju di SIÑOR sta na tudu kau, i na jubi maus ku bons.

—Provérbius 15.3

I ka ta yentra na se sintidu kuma ami N lembra di tudu se maldadi. Gosi, kusas mau ke fasi e rodia elis, e sta ña dianti.

—Oseias 7.2

Fiju di omi i na manda si anjus, e na junta na si renansa tudu kilis ku na pui utrus pa e kai, ku kilis ku ta fasi pekadu, e na bota elis na kau di fugu garandi; la e na cora, e na ñeme dinti. Esis na si skerda e na bai pa kastigu ku ka ta kaba, ma jintis justu e na bai pa vida ku ka ta kaba. —Mateus 13.41, 42; 25.46

Impius e na kai na kau di mortus, ku tudu pobus ku ta diskisi di Deus. —Salmu 9.17

E na sufri kastigu di pirdi intidu, separadu di pursensa di Siñor ku si puder gloriosu.

—II Tesalonisensis 1.9

Seu ku tera di aos, ki mesmu palabra di Deus na guardal pa

fugu; i na guardadu suguru pa dia di juisu, ora ku jinti ku nega Deus na kabadu ku el. —II Pedru 3.7

E ku manda, si bu mon o bu pe na pôu pa bu peka, kortal, bu fercal lunju. I minjor pa bu yentra na vida ku falta di un mon o un pe, te pa bu tene dus mon ku dus pe, bu botadu na fugu ku ka ta paga.

—Mateus 18.8

Deus mostra si raiba di seu riba di tudu maldadi ku pekadu di omis ku sukundi bardadi na se maldadi. —Romanus 1.18

Tudu kil ku si nomi ka ojadu skritu na libru di nomi di bibus, i bota-du na lagua di fugu.

—Apokalipsi 20.15

I marka un dia ki na bin julga mundu ku justisa, pa meu di un omi ki distina pa fasil. I da tudu jinti sertesa di kuma i na sedu, oca i lantanda ki algin na metadi di mortus.

—Aktus 17.31

Siñor i sibi libra di tentason kilis ku rispital; i ta guarda ki maus te dia di juisu pa e sedu kastigadu.

—II Pedru 2.9

Amor i kompletadu na nos pa no pudi tene fianza na dia di juisu, pabia suma ku Jesus sedu, asin ku no sedu tambi ne mundu.

—I Jon 4.17

Tudu jinti ten ku muri un biás;

dipus, julgamentu na bin.

—Ebreus 9:27

Anos tudu no ten ku parsi dianti di tribunal di Kristu, pa kada un risibi konformi i fasi na kurpu, ben o mal.

—II Koríntius 5.10

Kada un di nos no na da konta di no kabesa dianti di Deus.

—Romanus 14.12

N oja mortus, garandis ku pikininus, sikidu dianti di tronu. Librus yabridu. I yabri mas utru libru, kil ku ten nomi di bibus. Mortus julgadu pa kusas ku skirbidu na ki librus, konformi kusas ke fasi.

—Apokalipsi 20.12

Pursenti ku Deus pati i ka suma ki pekadu di Adon. Manga di jinti muri pabia di pekadu di ki un omi. Ma fabur di Deus i mas garandi, suma tamba pursenti ki pati manga di jinti pabia di fabur di un omi ki Jesus Kristu.

—Romanus 5.15

I ka ta sedu konformi kil ku omi misti, o ki fasi, ma i konformi miserikordia di Deus. —Romanus 9.16

Deus i kontra jinti ku ta yalsa se kabesa, ma i ta mostra fabur pa kilis ku ta baša se kabesa.

—I Pedru 5.5b

Bo sibi kuma no Siñor Jesus Kristu staba pruntu pa da. El i se-

duba riku, ma pa amor di bos i bida pobri, pa i pudi fasi bos riku pabia di si pobresa. —II Korintius 8.9

Deus obrigadu pa garandi kusa ki danu ku no ka pudi konta!

—II Korintius 9.15

Nunde ku pekadu ciu, fabur di Deus i mas ciu, pa es fabur pudi rena na justisa pa tisi vida ku ka ta kaba, pabia di no Siñor Jesus Kristu, suma ku pekadu rena na mortu.

—Romanus 5.20b, 21

Apostolus e na testifika ku garandi puder di manera ku Siñor Jesus lanta di mortu. Garandi fabur di Deus staba riba delis tudu.

—Aktus 4.33

Na ki tempu ku pasa, Deus fica uju pa se falta di kunsimentu, ma gosi i da ordi pa tudu omi na tudu lugar pa e ripindi. —Aktus 17.30

N na fala bos nau; ma abos, si bo ka ripindi, abos tudu bo na muri na mesmu manera. —Lukas 13.3

Bo ripindi di bo pekadu, pabia renu di seu sta pertu. —Mateus 3.2

Kil ku sukundi si pekadu nunka i ka na bai dianti, ma kil ku konfesal, i disal, i na yangasa miserikordia. —Provérbius 28.13

Pedru fala elis: Bo ripindi, kada un di bos, bo sedu batisadu na nomi di Jesus Kristu, pa bo pekadu pudi purdadu. Asin bo ta

risibi Spiritu Santu ku Deus na pati bos . . . Asin, bo ripindi, bo konverti, pa bo pekadu limpadu, pa Siñor da bos tempu di arnobason. —Aktus 2.38; 3.19

Tristesa ku bin di Deus i ta tisi mudansa di korson ku ta da salbason, ku ningin ka ta fika ripindidu del. Ma tristesa di mundu ta tisi mortu. —II Koríntius 7.10

N na konta bos kuma asin ki ta ten alegria na metadi di anjus di Deus pa un algin di mau fama ku ripindi. —Lukas 15.10

Bo kaba ku tudu kusas mau ku bo fasiba; bo ranja nobu korson ku nobu spiritu . . . —Ezekiel 18.31a

Si un impiu konverti di tudu pekadus ki fasi, i obdisi tudu ña leis, i fasi kil ki justu, i bon, di sertesa i na vivi, i ka na muri.

—Ezekiel 18.21

Impiu i dibi di disa si kamiñu; omi malvadu i dibi di disa si pensamentus, pa i konverti pa SIÑOR, ku na ten pena del; pa i riba pa no Deus, pabia i sta pruntu pa purda.

—Isaías 55.7

Si bo purda kilis ku yara bos, asin tambi ku bo Pape ku sta na seu na purda bos.

—Mateus 6.14

Jesus oja se fe, i fala duenti: Ña fiju, bu pekadu i purdadu.

—Markus 2.5

... palabra di purdon di pekadu i kontadu pa bos pabia del, Jesus ... Deus i yalsal pa si mon direita, pa i sedu Šef i Salbadur, pa da Israel manera di ripindi, pa se pekadu purdadu.

Ali N sta na porta, N na bati. Si algin obi ña fala, i yabri porta, N ta yentra na si kasa, N ta sia ku el; el i ta sia ku mi tambi.

—Apokalipsi 3.20

Si no fala kuma no ka ten pekadu, no na ngana no kabesa; bardadi ka sta na nos. Si no konfesa no pekadu, suma el i justu, i di fian-sa, i ta purda no pekadu, i ta limpanu di tudu kusa mal.

—1 Jon 1.8, 9

Deus mostra tudu jinti si fabur ku ta salba, pa nsinanu nega vida di impiu ku tudu disežu di mundu, pa no sibi governa no kabesa ne mundu di gosi, no sedu retu, no yanda suma ku Deus misti.

—Titu 2.11-12

Bo guarda bo pensamentu na kusas di seu; i ka na kusas di tera.

—Kolosensis 3.2

Ka bo toma parti na obras di su-kuru ku ka ten purbitu, ma bo pui ki obras na lus.

—Efésius 5.11

Ka bo ama mundu nin kusas ku sta nel. Si algin ama mundu, amor di no Pape ka sta nel. Pabia tudu ku sta na mundu, kusas ku no kur-pu disja, ku uju ta oja, i misti, ku

vida di ronku, es tudu i ka di no Pape, ma i di mundu.

—I Jon 2.15, 16

Abos jintis ku ka fiel pa Deus, bo ka sibi kuma amisadi ku mundu i inimisadi kontra Deus? Asin kil ku misti sedu amigu di mundu i ta bida inimigu di Deus.

—Tiagu 4.4

Bo laba tok bo sedu limpu. Bo tira maldadi ku bo na fasi di dian-ti di ña rostu. Bo para di fasi mal.

—Isaías 1.16

Ka bo fasi suma ku mundu na fasi, ma bo disa Deus arnoba bo pensamentu, pa rabida bo manera di yanda. Asin bo ta pudi rapara kal ki vontadi di Deus, kil ki bon, i pirfitu, i sabi.

—Romanus 12.2

N na da bos un korson nobu; N na pui spiritu nobu dentru di bos. N na tira bos bo korson di pedra, N na da bos un korson dosi.

—Ezekiel 36.26

Si algin liga ku Kristu i sedu nobu algin. Kusas beju pasa ja. Tudu bida nobu. —II Koríntius 5.17

Jesus ruspundil: N na kontau bardadi, kuma kin ku ka padidu utru biás ka pudi oja renu di Deus.

—Jon 3.3

Ma bo labadu, bo santifikadu, bo ocadu justu na nomi di Siñor Jesus Kristu, pa Spiritu di no Deus.

—I Koríntius 6.11b

Si bo sibi kuma el i justu, bo sibi kuma tudu kin ku ta fasi kusa diritu i si fiju . . . No sibi kuma tudu kil ku padidu na familia di Deus i ka ta fasi pekadu, pabia Fiju di Deus ta guardal; ki malvadu ka ta toka nel.

—I Jon 2.29; 5.18

Pabia di palabra di Deus ku tene vida, ku ta fika pa sempri, ku pui bo padidu utru biás; i ka di pape ku ta muri, ma di pape ku ka ta muri.

—I Pedru 1.23

Ladron ta bin son furta, i mata, i dana. Ami N bin pa jinti ten vida, pa e tenel manga del.

—Jon 10.10

Na tempu pasadu bo spiritu sta-ba mortu pabia di bo pekadu ku maldadi . . . (Deus) i vivifikanu. . . Na no union ku Kristu Jesus i lantandanu di mortu, i sintandanu na mundu selestial junto ku el.
—Efésius 2.1, 5, 6

El propi i leba no pekadu na si kurpu na krus, pa no pudi sta suma mortu na ladu di pekadu, no yanda diritu suma ku Deus misti. Bo kuradu pabia el i molestadu.
—I Pedru 2.24

Bo lantadadu pa vida junto ku Kristu. Asin bo pui sintidu na kusas ku sta na seu, nunde ku Kristu sinta na direita di Deus. Bo

guarda bo pensamentu na kusas di seu; i ka na kusas di tera. Pabia bo muri; bo vida sta sukundidu ku Kristu na Deus. —Kolosensis 3.1-3

Kilis ku sedu di Kristu Jesus e krusifika se naturalesa umanu, ku tudu si disežu mau ku na yardi dentru del. Si i Spiritu ku danu vida, no disal tambi pa i gianu na no kamiñu.
—Gálatas 5.24-25

Anos ku muri ja pa pekadu, kuma ku no na kontinua nel? . . . Asin tambi abos bo fasi di konta kuma bo sta mortu pa pekadu, ma bo sta bibu pa Deus junto ku Kristu Jesus.
—Romanus 6.2, 11

Kil ku sumia na si naturesa umanu i ta bin kebra mortu la. Ma kil ku sumia na Spiritu, i ta kebra vida ku ka ta kaba ku Spiritu padi pa el.
—Gálatas 6.8

Suma ku Moisés lantanda serpenti di feru na lala, i asin tambi ki pirsis pa Fiju di omi lantandadu, pa tudu kil ku setal i ta ten vida ku ka ta kaba. —Jon 3.14, 15

Vida iternu i es: pa tudu jinti kunsu abo son, uniku Deus bardaderu, ku Jesus Kristu, kil ku bu manda.
—Jon 17.3

Bo diskansa bo korson tarpajadu. Suma bo fia na Deus, bo fia tambi na mi. Kasa di ña Pape ten

manga di moradias; si i ka el ba, N ta kontaba bos. N na bai purpara bos lugar.
—Jon 14.1, 2

Kin ku seta Fiju ta ten vida ku ka ta kaba, ma kin ku ka seta Fiju ka ta oja vida, ma kastigu di Deus ta fika riba del.
—Jon 3.36

Pagamentu di pekadu i mortu, ma kil ku Deus ta danu di grasa i vida ku ka ta kaba, pabia di Kristu Jesus no Siñor.

—Romanus 6:23

N na konta bos bardadi, kin ku obi ña palabra, i seta kil ku mandan, ta ten vida ku ka ta kaba. I ka na kondenadu, ma i pasa ja di mortu pa vida.
—Jon 5.24

E mesmu Spiritu i ta junta ku no spiritu pa diklara kuma no sedu fiju di Deus. —Romanus 8.16

Kin ku tene Fiju i tene vida. Kin ku ka tene Fiju di Deus i ka tene vida. N na skirbi e kusas pa bos ku fia na nomi di Fiju di Deus pa bo sibi kuma bo tene vida ku ka ta kaba. —I Jon 5.12, 13

Kin ku ten ña mandamentus, i obdisi elis, el ku aman. Kin ku aman, ña Pape tambi ta amal; ami N ta amal, N ta mostral ami i kin. —Jon 14.21

Fasi kusas justu i ta tisi pas; si rusultadu i diskansu ku suguransa pa sempri. —Isaías 32.17

Suma ku bo sedu si fijos, Deus manda Spiritu di si Fiju dentru di no korson, ku ta coma: Deus no Pape. —Gálatas 4.6

No sibi kuma no sta na Deus, Deus sta na nos, pabia i danu si Spiritu. —1 Jon 4.13

Si no obdisi mandamentus di Deus no ta sibi kuma no kunsil. —1 Jon 2.3

Kin ku obdisi si mandamentu i sta na Deus; Deus sta nel. Es ku ta pui no sibi kuma i sta na nos, pabia di Spiritu ki danu. —1 Jon 3.24

Ami i porta; kin ku yentra na mi i ta salba. . . —Jon 10.9a

KRISTU DENTRU DI NOS I TA DA KONTENTAMENTI

Gosi N na bai pa bo. N na konta e kusas na mundu, pa e ten ña alegria kompletu nelis propi.

—Jon 17.13

Renu di Deus i ka kumida, nin bibida, ma i pa ten vida justu ku pas ku alegria ku Spiritu Santu ta da.

—Romanus 14.17

Ku kontentamenti bo ta tira yagu na fontis di salbason.

—Isaiás 12.3

N sta ja krusifikadu ku Kristu. N na vivi, ma i ka mi ku na vivi, ma Kristu na vivi na mi. Vida ku gosi N na vivi na kurpu, N na vivil na fe ku N ten na Fiju de Deus, kil

ku aman, i ntrega si kabesa pa mi.

—Gálatas 2.20

N konta bos es kusa pa ña alegria sta sempri na bos, pa bo alegria sedu kompletu. —Jon 15.11

Bu na pun pa N kungsi kamiñu di vida. Na bu pursensa bu na incin di alegria; na bu ladu direita i ten kusas sabi ku na tarda pa sempri.

—Salmu 16.11

Asin tambi, abos gosi na barda-di bo ten kasabi, ma N na torna oja bos; bo korson na inci di alegria; ningin ka na pudi tira bos el. Te gosi bo ka pidi nada na ña nomi. Bo pidi, bo ta risibi, pa bo alegria pudi sta kompletu. —Jon 16.22, 24

Si bo ka obdisi ke ku SIÑOR na fala, ma bo nega si ordi, mon di SIÑOR i na sta kontra bo, suma ki staba kontra bo papes.

—I Samuel 12.15

Nta bo ka sibi kuma ora ku bo ntrega bo kurpu suma katibu pa sirbi algin, bo sedu katibu di kil ku bo na sirbi? Bo sedu katibu di pekadu ku ta leba bos pa mortu, o bo sedu katibu pa obdisi pa fasi bos justu.

—Romanus 6.16

Abos ku na sufri, i na lebia bos, ku nos tambi. Es tudu na sedu ora ku Siñor Jesus parsi na seu ku si anjus puderosu, ku fugu ku na yardi, pa kastiga kilis ku nega kungsi

Deus, ku kilis ku ka obdisi Bon Noba di no Siñor Jesus. E na sufri kastigu di pirdi intidu, separadu di pursensa di Siñor ku si puder gloriosu.—II Tesalonisensis 1.7-9

Aos N na pui bo dianti benson ku maldison. I benson si bo obi mandamentus di SIÑOR bo Deus, ku N na da bos aos; ma i maldison si bo ka obi mandamentus di SIÑOR bo Deus.

—Deuteronómiu 11.26-28a

Sortiadu i kilis ku laba se ropa na sangi di Karnel, pa e ten diritu na arvori di vida, pa e pudi yentra na porton di prasa.

—Apokalipsi 22.14

34 I PIRSIS KONTA JINTI KUMA ABO I DI KRISTU

Kada boka ten ku konta klaru kuma Jesus Kristu i Siñor, pa gloria di Deus Pai. —Filipensis 2.11

Asin, tudu kil ku konta dianti di jinti kuma el i di mi, N na konta dianti di ña Pape ku sta na seu kuma el i di mi. Ma kil ku negan dianti di jinti, tambi N na negal dianti di ña Pape ku sta na seu.

—Mateus 10.32, 33

Si ku bu boka bu diklara kuma Jesus i Siñor, na bu korson bu fia kuma Deus lantandal na metadi di mortus, bu ta sedu salbu. Pabia ku korson no ta fia pa no ocadu justu; ku boka no ta konta pa no yangasa salbason.

—Romanus 10.9, 10

Kil ku nega Fiju, tambi i ka tene si Pape. Kil ku seta Fiju, i tene tambi si Pape. —I Jon 2.23

Si algin ten borgoña di mi ku ña palabra, Fiju di omi i na sinti borgoña del ora ki bin na si gloria, ku di si Pape, ku di santu anjus.

—Lukas 9.26

Asin ku bo ta pudi rapara si i Spiritu di Deus: Tudu algin ku fala klaru kuma Jesus Kristu bin suma omi, i ten Spiritu di Deus.

—I Jon 4.2

Es i palabra ku bu pudi fia nel: Si no muri ku el, tambi no na vivi ku el. Si no fika firmi, tambi no na rena ku el. Si no negal, el tambi i na neganu. —II Timotiu 2.11-12

Bo disperta, bo sedu jiru, pabia bo inimigu ki diabu i na yanda na bo roda, suma lion ku na somna, i na buska kil ki pudi nguli.

—I Pedru 5.8

Ki malvadu i na bin na puder di Satanás; i na fasi tudu koldadi di sinal ku milagri di mintida.

—II Tesalonisensis 2.9

Pa kabanta, bo fika mas forti na Siñor pabia di si forti puder. Bo bisti tudu armadura ku Deus da bos, pa bo pudi fika firmi kontra armadilya di stusia di diabu.

—Efésius 6.10, 11

Na ki tempu Spiritu di Deus gia Jesus; i bai pa lala pa diabu pudi

tental. Jesus falal: Sai di li, Satanás, pabia Skritura fala: Bu na adora Siñor bu Deus; i el son ku bu na sirbi. Na ki ora diabu disal. Anjus ciga, e sirbil.

—Mateus 4.1, 10, 11

... pa bu yabri se uju, pa bu pui elis pa e rabida di sukuru pa lus, di puder di Satanás pa Deus, pa e pudi ten fe na mi, pa se pekadu purdadu, e risibi yardansa na metadi di kilis ku Deus fasi si pobu.

—Aktus 26.18

Armas ku no ta geria ku elis e ka suma kilis di mundu, ma i arma ku ten puder di Deus pa kebra murus forti. —II Koríntius 10.4

Suma ku fijus ta junta karni ku sangi, asin tambi ku el i junta ne mesmu kusas, pa i pudi muri; pabia di si mortu i pudi vensi kil ku ten puder riba di mortu, ku sedu diabu.

—Ebreus 2.14

Kin ku ta fasi pekadu i di diabu, pabia diabu peka desdi kumsada. Pa e fin ku Fiju di Deus bin, pa kaba ku kusas ku diabu fasi.

—I Jon 3.8

Bo baña pa Deus; bo firma kontra diabu; i ta kuri di bos. Bo ciga pertu di Deus; i ta ciga pa bos.

—Tiagu 4.7-8a

Kin ku na rapatinu di amor di Kristu? Kansera? o kasabi? o pir-

sigison? o fomi? o falta di ropa? o pirigu? o spada? Ma na tudu es kusa no na sedu mas di ki vensiduris pabia di kil ku amanu.

—Romanus 8.35, 37

Dipus, ki malvadu i na parsi. Ma ora ku Siñor Jesus bin, i na matal ku folgu di si boka; i na kaba ku el ku lus ku na lampra ora ki na bin. Ki malvadu i na bin na puder di Satanás; i na fasi tudu koldadi di sinal ku milagri di mintida.

—II Tesalonisensis 2.8, 9

Ña fijus, abos bo sedu di Deus; bo vensi ki profetas; pabia kin ku sta na bos i mas ki algin ku sta na jinti di mundu.

—I Jon 4.4

AMOR, PROBA KUMA ALGIN I DISIPULU

37

N pudi fala lingus di omis, o te di anjus, ma si N ka ten amor, N ta sedu suma sinu ku na somna, o suma feru ku na batidu.

—I Koríntius 13.1

Spiritu di Deus ta padi frutu di amor, ku alegria, ku pas, ku pasensa, ku pruntidon pa juda, ku bondadi, ku sedu algin di fiansa, ku mansesa, ku puder pa governa kurpu.

—Gálatas 5.22

No sibi kuma no kapli ja di mortu pa vida, pabia no ama no ermons. Kin ku ka ama si ermon sta inda na mon di mortu. —I Jon 3.14

Jesus torna puntal sugundu biás: Simon, fiju di Jon, bu aman?

I falal: Sin Siñor, bu sibi kuma N amau. I falal: Bakia ña karnel.

—Jon 21.16

Si bo aman, bo ta obdisi ña mandamentus.

—Jon 14.15

Si algin fala kuma i ama Deus, ma i ka gosta di si ermon, i munturus. Pabia kil ku ka ama si ermon ki oja, kuma ki pudi ama Deus ki ka oja?

—I Jon 4.20

Si bo ama ijutru, tudu jinti ta rapara kuma abos i ña disipulus.

—Jon 13.35

Pabia no amor pa Deus ta mostra na manera ku no ta obdisi si mandamentu. Si mandamentus gora e ka kansadu. —I Jon 5.3

Anos no sedu tustumuña di tudu ki fasi na tera di judeus, suma na Jerusalen. Dipus e matal, e pindural na madera. Ma na dia di tris Deus lantandal, i pul pa i ojadu. I ka tudu jinti ku ojal, son tustumuñas ku Deus kujiba ja, ku sedu anos ku kume ku bibi ku eluntu dipus ki lanta di mortu.

—Aktus 10.39-41

Oca ku Jesus lanta di mortu par mañá sedu na purmeru dia di semana, i parsi purmeru pa Maria Madalena, kil ki tira seti dimoniunel.

—Markus 16.9

Oca oitu dia pasaba ja, si disipulus staba dentru utru biás. Tomé staba la ku elis; portas sta ficadu.

Jesus ciga, i parsi na se metadi, i fala elis: Pas ta sta ku bos. Dipus i fala Tomé: Pui bu dedu li, bu jubiña mon; ciganta bu mon, bu mitil na ña ladu; ka bu sedu duvidosu, ma sedu krenti. Tomé ruspundil: Ña Siñor! Ña Deus! —Jon 20.26-28

I ntregadu pa i pudi muri pabia di no pekadu; i lantandadu pa no pudi sedu justu. —Romanus 4.25

Ma na ladu di spiritu di santidadi, manera ki lanta di mortu i mostradu ku puder kuma el i Fiju di Deus. —Romanus 1.4

... Pa ke ku bo na buska un algin bibu na metadi di mortus? I ka sta li, ma i lanta.

—Lukas 24:5b, 6a

N na torna konta bos bardadi, kuma ora i na bin, i ciga ja, ku mortus na obi vos di Fiju di Deus; kilis ku obil e ta ten vida. Ka bo dimira. I na ciga ora ku tudu mortus ku nteradu na obi si vos; e na sai na koba. Kilis ku fasi ben e na lanta pa vida; kilis ku fasi mal e na lanta pa kondenason.

—Jon 5.25, 28, 29

Nta bo ka sibi kuma anos tudu ku batisadu na Kristu Jesus no batisadu tambi na si mortu? Oca no batisadu, no nteradu ku el na mortu, pa no pudi yanda na nobu vida, suma ku puder gloriosu di Pai lantanda Kristu di mortu. Si

no junta ku el na parsensa di si mortu, asin tambi no na sedu na parsensa di si resureison.

—Romanus 6.3-5

Si Kristu mora na bos . . . Spiritu sta bibu manera ku bo ocadu justu dianti di Deus. Si Spiritu di kil ku lantanda Jesus di mortu sta na bos, ki algin ku lantanda Kristu di mortu tambi i na pui vida na bo kurpu mortal pabia di si Spiritu ku sta na bos.

—Romanus 8.10, 11

No sibi kuma kil ku lantanda Siñor Jesus pa vida, i na lantandanu ku el; i na lebanu dianti deluntu ku bos. —II Koríntius 4.14

... kuma i ta libertanu di mon di no inimigus, pa no pudi sirbil sin medu, pa no sedu santu i justu si dianti tudu dias di no vida.

—Lukas 1.74, 75

Ermons ku N kiri, suma ku no ten es purmesas, no limpa di tudu susidadi di kurpu ku di spiritu, pa no kompleta no santidadi ku rispitu pa Deus. —II Korintius 7.1

Na bardadi ami N na batisa bos ku yagu, suma bo ripindi, ma kil ku na bin ña tras i mas mi ten puder; nin N ka mersi leba si sapatu. El ku na bin batisa bos ku Spiritu Santu ku fugu. —Mateus 3.11

Deus no Pape pui sintidu na bos desdi antigamenti, i kuji bos, i fasi

bos si pobu ku si Spiritu, pa bo pudi obdisi, pa sangi di Jesus Kristu pudi limpa bos.

—I Pedru 1.2a

Si un algin limpa si vida de kusas mau, i ta sedu suma ki losa di lugar di onra, separadu pa Mestre usal, purparadu pa tudu bon tarbaju. —II Timotiu 2.21

Suma kil ku coma bos i puru, bo sedu tambi puru na tudu ku bo na fasi.

—I Pedru 1.15

Bo da SIÑOR ki gloria ku si nomi mersi; bo adora SIÑOR na bonitasku di si puresa. —Salmu 29:2

Deus ka comanu pa susidadi, ma pa sedu puru.

—1 Tesalonisensis 4.7

E ku manda Jesus tambí muri
fora di prasa, pa i pudí santifika
pobu ku si propi sangi.

—Ebreus 13.12

Mesmu antis di mundu kumpu-
du, Deus kujinuba ja na Jesus pa
no sedu si pobu, sin manca si dian-
ti, incidu di amor. Bo bisti nobu
naturesa ku Deus kria, ku na mos-
tra na vida bardaderu, justu i san-
tu.

—Efésius 1.4; 4.24

I na tene la un kamiñu altu, un
kamiñu ku na comadu kamiñu di
puresa. Kilis ku ka limpu e ka na
yanda nel; i na sedu pa kilis ku
sedu puru. Kilis ku na yanda la,
nin si e ka jiru, e ka na yara.

—Isaías 35.8

Si no konfesa no pekadu, suma
el i justu, i di fiansa, i ta purda no
pekadu, i ta limpanu di tudu kusa
mal.

—I Jon 1.9

Suma ku tudu e kusas ten ku
pajigadu, kal koldadi di jinti ku bo
dibi di sedu? Bo dibi di tene vida
limpu, son pa Deus. —II Pedru 3.11

Bo buska ten pas ku tudu jinti;
bo buska tambí un vida puru, pa-
bia sin el ningin ka na oja Siñor.

—Ebreus 12.14

Ma gosi bo sedu libri di pekadu,
bo fasidu katibus di Deus. Frutu
ku bo ten gosi i na leba bos pa
puresa; dipus pa vida ku ka ta
kaba.

—Romanus 6.22

Si abos ku sedu mau bo sibi da bon kusas pa bo fijus, ku fadi bo Pape ku sta na seu i ten ku da Spiritu Santu pa kilis ku pidil.

—Lukas 11.13

Dipus ke ora, lugar ke juntaba nel tirmi. Elis tudu e incidu ku Spiritu Santu, e kumsa na konta palabra di Deus ku koražen.

—Aktus 4.31

N na pui ña spiritu dentru di bos, N na fasi pa bo yanda konformi ña leis, pa bo pui sintidu pa obdisi ña ordis.

—Ezekiel 36.27

Abos bo ka na yanda ja na vontadi di bo kurpu, ma na vontadi di Spiritu, si na bardadi Spiritu di Deus sta na bos.

—Romanus 8.9a

Ma bo ta risibi puder di Spiritu Santu ku na bin riba di bos. Bo ta sedu ña tustumuñas.

—Aktus 1.8a

Krentis staba incidu di alegria ku Spiritu Santu.

—Aktus 13.52

Ma el, incidu di Spiritu Santu, pui si uju na seu, i oja gloria di Deus ku Jesus sikidu na mon direita di Deus.

—Aktus 7.55

El i era bon omi, ku inci ku Spiritu Santu, ku fe. Manga di jinti bai pa kamiñu di Siñor.

—Aktus 11.24

Ka bo cami ku biñu ku ta dana vida, ma bo inci ku Spiritu Santu.

—Efésius 5.18

SINOR sta pertu di kilis ku ten korson kebrantadu; i ta salba kilis ku se spiritu sta batidu.

—Salmu 34.18

SINOR fala: Ña mon ku kumpu tudu e kusas . . . Ma kin ku N na jubi pa el? N na jubi pa kil ki umildi i bas di spiritu, ku ta tirmi ora ku N papia.

—Isaiás 66.2

Jesus falal: Si bu fia. Tudu pudi sedu pa kil ku ten fe. —Markus 9.23

Ña ermons ku N ama, ka bo straña e forti probason ku bin riba di bos pa spurmenta bos, suma ki kusa straño ku kontisi, ma bo kontenti suma ku bo toma parti na sufrimentu di Kristu pa, ora ku

si gloria mostradu, bo ta fika kontenti ku alegria. —I Pedru 4.12, 13

Deus i na limpa tudu larma na se uju. Mortu ka na ten mas, nin tristesa, nin cur, nin dur, pabia purmeru kusas pasa ja.

—Apokalipsi 21.4

Fia na **SINOR**, bu fasi ben; bu na mora na tera; di sertesa bu na oja di kume.

—Salmu 37.3

Pabia de gloria ku garandesa ku manda i purmitinu garandi kusas di balur, ku pui pa bo pudi kapli di podrisa ku sta na mundu pabia di disezus mau, pa bo pudi toma parti na naturesa di Deus.

—II Pedru 1.4

No ka ten un êf di saserdoti ku ka pudi ten pena di no frakesa, ma un ku sedu tentadu na tudu, suma nos, ma ku nunka ka peka. Gosi i pudi juda kilis ku sta na tentason, manera ku el propi i pasa tentason ku sufrimentu.

—Ebreus 4.15; 2.18

Deus, no fonti di pas, i ka na tarda pa kebra Satanás bas di bo pe.

—Romanus 16.20a

Omi justu i pudi pasa manga di kasabi, ma SIÑOR ta libral di tudu.

—Salmu 34.19

Tudu koldadi di tentason ku bin pa bos i suma di tudu jinti. Ma Deus i fiel; i ka na disa bo sedu tentadu mas di kil ku bo pudi ku

el, ma na ora di tentason i ta da tambi manera di kapli, pa bo pudi saportal.

—I Koríntius 10.13

Ora ku bu pasa na yagu fundu, N ta sta ku bo. Ora ku bu na kambarius, yagu ka ta kubriu. Ora ku bu pasa na fugu, bu ka na kema; sama di fugu ka na pega na bo.

—Isaías 43.2

No sibi kuma Deus ta usa tudu kusa pa ben di kilis ku amal, kilis ki coma suma ki distina.

—Romanus 8.28

Sortiadu un algin ku saporta tentason, i fika fiel, pabia, dipus di i pasa prova, i ta risibi premiu ku sedu vida ku Deus purmiti kilis ku amal.

—Tiagu 1.12

Kil ku vensi, N na fasil firkija na templu di ña Deus, nunde ki ka na sai mas. N na skirbi nomi di ña Deus riba del, ku nomi di prasa di ña Deus, ku sedu nobu Jerusalem ku ña Deus na disinti di seu, ku ña nobu nomi tambi. —Apokalipsi 3.12

Kil ku vensi, asin ki na bisti di ropa branku. Di nin un manera N ka ta riska si nomi na libru di bibus. N na coma si nomi dianti di ña Pape, dianti di si anjus.

—Apokalipsi 3.5

Kil ku vensi, N ta disal i sintauntu ku mi na ña tronu, suma ku ami N vensi, N sinta ku ña Pape na si tronu. —Apokalipsi 3.21

Kil ku ngaña, i na yarda tudu e kusas. Ami N na sedu si Deus, el i na sedu ña fiju. —Apokalipsi 21.7

Kin ku tene oreja, pa i obi ke ku Spiritu na fala igrežas. Kil ku vensi, N na dal di utru maná sukundidu. N na dal tambi pedra branku ku skirbidu nobu nomi ku ningin ka kungsi, son kil ku risibil.

—Apokalipsi 2.17

Kin ku tene oreja, pa i obi ke ku Spiritu na fala igrežas. Kil ku vensi, N na dal diritu di kume frutu di po di vida ku sta na jardin di Deus.

—Apokalipsi 2.7

Kil ku vensi, kil ku fasi ña vontadi te na fin, N na dal otrida-di riba di nasons. —Apokalipsi 2.26

DEUS FALA KU NOS ASERKA DI KABA KASAMENTI

Pa kilis ke kasadu, N ten mandamentu, ma i ka di mi, i di Siñor, kuma minjer ka dibi di bandona si maridu. Ma si i bandonal, pa i fika sin kasa, o nta pa i torna ku si maridu. Omi tambi pa i ka larga si minjer.

—I Koríntius 7.10, 11

Un minjer kasadu sta ligadu ku si omi pabia di lei nkuantu omi sta bibu, ma si i muri, minjer sta libri di ki lei di kasamenti. Si i bai kiri utru omi ku si maridu inda sta bibu, i ta faladu kuma i sta na adulteriu. Ma si maridu muri, minjer sta libri di ki lei.

—Romanus 7.2, 3

Un omi ku disa si minjer, i kasa ku utru, i sta na adulteriu. Kil ku kasa ku minjer ku si omi nega, i sta na adulteriu tambi.

—Lukas 16.18

N na konta bos, tudu omi ku kaba ku si minjer, si i ka pabia di kai cai, i na pul pa i fasi adulteriu. Kil ku kasa ku minjer ku dispididu, i na fasi adulteriu.

—Mateus 5.32

Minjer kasadu i ta sta ligadu ku si omi nkuantu kila sta bibu, ma si i muri, minjer i ta fika libri pa kasa ku kin ki misti; ma son si omi i krenti tambi.

—1 Koríntius 7.39

Si N bai purpara bos lugar, N ta bin utru biás, N ta leba bos pa mi propi, pa nunde ku N sta nel, bo ta sta la tambi. —Jon 14.3

N ka na tarda pa bin. Rakada kil ku bu ten pa ka ningin toma bu koroa. —Apokalipsi 3.11

Kin ku ten borgoña di mi ku ña palabra, na metadi di jinti mau i infiel ne mundu di aos, Fiju di omi tambi i na ten borgoña del, ora ki bin na gloria di si Pape, ku si santu anjus. —Markus 8.38

Suma ku rilampagu ta numia seu na saida di sol te na si kaida, asin ki na sedu ora ku Fiju di omi na bin. —Mateus 24.27

Ki ora i na ocadu na seu sinal di Fiju di omi. Tudú rasa na mundu e na cora; e na oja Fiju di omi i na bin riba di nuvens di seu, ku puder ku garandi gloria. —Mateus 24.30

Bo sedu tambi pasenseru; bo tesanta bo korson, pabia Siñor pertu bin. —Tiagu 5.8

Na ki dia i na ten gritu di orden, ku vos di arkanju, ku toku di trombeta di Deus. Siñor propi i na disí di seu. Kilis ku muri ku fe na Kristu e na lanta purmeru. Dipus, anos ku sta inda bibu, no na rabadaduuntu ku elis na nuven, pa kontra ku Siñor na ar. Asin no ta stauntu ku Siñor pa sempri.

—1 Tesalonisensis 4.16-17

(Anjus) e punta elis: Omis di Galileia, pa ke ku bo sikidu, bo na jubi pa seu? E Jesus ku lebadu na bo metadi pa seu i ten ku bin suma manera ku bo ojal i na bai pa seu. —Aktus 1.11

Na ki ora e na oja Fiju di omi na bin na un nuven, ku puder, ku garandi gloria. —Lukas 21.27

Bo jubi, ami N na bin suma ladron. Sortiadu kil ku ka durmi, ku rakada si ropa pa ka i yanda nun, pa si borgoña ka ojadu. —Apokalipsi 16.15

Ña kiridu ermons, gosi no sedu fijus di Deus, ma ke ku no na bin sedu i ka klaru inda. Ma no sibi, ora ku Kristu bin, no na sedu

suma el, pabia no na ojal manera ki sedu. Tudu ku tene es speransa nel, i dibi di limpa si vida, suma ku el i limpu. —I Jon 3.2, 3

Asin bo sta tambi pruntu, pabia Fiju di omi na bin na ora ku bo ka pera. —Lukas 12.40

Fiju di omi na bin bin na gloria di si Pape, ku si anjus; i na paga kada un konformi kusa ki fasi. —Mateus 16.27

Ma anos, no sidadi i na seu, la nunde ku no na pera Salbadur, Siñor Jesus Kristu, ku na bin pa i rabida no kurpu koitadi i fraku suma si kurpu gloriosu, ku mesmu puder ki ten di pui tudu kusa fika bas del. —Filipensis 3.20, 21

PALABRA DI DEUS

Seu ku tera na pasa, ma ña palabra ka na pasa. —Lukas 21.33

Nin un profesia ka bin son di pensamentu di omi, ma Spiritu Santu ku leba omis pa fala palabras ku bin di Deus.

—II Pedru 1.21

Tudu Skritura, i Deus ku inspiral; i ten purbitu pa nsina, pa raprindi, pa kuriži, pa mostra manera di yanda diritu.

—II Timotiu 3.16

Bu palabra i kanderu pa ña pe; i lus pa ña kamiñu.

—Salmu 119.105

SINOR, bu palabra i na fika firmi na seu pa sempri.

—Salmu 119.89

NO ORA, NO PURDA

(Jesus fala:) Bo dibi di ora asin: No Pape ku sta na seu, no disja pa bu nomi sedu onradu, pa bu renu bin, pa bu vontadi fasidu na tera suma na seu. Patinu aos kumida ku no pirsisa del. Purdanu mal ku no fasi suma ku no purda kilis ku fasinu mal. Ka bu lebanu pa probason, ma libranu di ki algin malvadu. Pabia renu i di bo, ku puder ku gloria pa sempri. Amen. Si bo purda kilis ku yara bos, asin tambi ku bo Pape ku sta na seu na purda bos. Ma si bo ka purda jinti ku yara bos, asin tambi ku bo Pape ka na bin purda bos bo mal ku bo fasi. —Mateus 6.9-15

Published in numerous languages by World Missionary Press as God supplies funds in answer to prayer. If you would like more copies for careful distribution, please write to us in English:

World Missionary Press, Inc.
P.O. Box 120
New Paris, IN 46553-0120 USA